



REPUBLIKA E KOSOVËS

KUVENDI I KOMUNËS-VUSHTRRI

**PROCESVERBAL**  
**NGA MBLEDHJA E -III- E RREGULLT E -V- MË RADHË E KUVENDIT TË**  
**KOMUNËS SË VUSHTRRIË, MBAJTUR MË 28 MAJ 2020**

*Mbledhja është mbajtur në objektin e Shkollës së Mesme Gjinnazi "Eqrem Çabej" në Vushtrri, duke filluar në orën 14:20.*

Në këtë mbledhje ishin të pranishëm anëtarët e Kuvendit të Komunës së Vushtrris:

Abdullah Vojvoda, Ali Januzi, Agim Bregaj, Agron Perçuku, Arta Ymeri, Basri Menxhiqi, Bahrije Ademi Murati, Fatmire Saraçi, Ermal Lahu, Fakete Dushi, Faton Shabani, Fitim Halili, Gresa Muli, Gentiana Rama, Habibe Gërzhaliu, Ilmi Azemi, Kushtrim Hyseni, Hajriz Mustafa, Lorik Maxhuni, Miljan Bojković, Mehdi Bejtullahu, Mejreme Ismajli, Nasuf Aliu, Nezir Klinaku, Nurtene Çerkezi-Gyshinca, Sajdie Bajgora, Selim Rustemi, Shkëlzen Feka, Safet Idrizi, Melihate Basholli-Latifi, Suzana Sylja Teuta Aruçi Shartari dhe Ymer Haradinaj.

**Munguan:** Hysni Gërguri, dhe Shpëtim Zhegrova.

Mbledhjen e hapi dhe e kryesoi Nasuf Aliu – kryesues i kuvendit, i cili konstatoi se në sallë janë prezent 33 anëtarë të kuvendit, kuorum ky i mjaftueshëm për zhvillimin e punimeve të mbledhjes plenare dhe për marrje të vendimeve të plotfuqishme, andaj procedoi me rendin e ditës.

Të pranishëm në këtë mbledhje ishin edhe Kryetari i komunës, z.Xhafer Tahiri dhe nënkryetari i komunës z. Besim Muzaqi, drejtor të drejtorive komunale dhe zyrtar kompetent komunal.

**Nasuf Aliu, kryesues i kuvendit**-pasi hapi mbledhjen, njoftoi se agjenda e kësaj mbledhje është vazhdim nga mbledhja e muajit mars e cila nuk kishte mundur të mbahet si rezultat i përhapjes së pandemisë covid-19. Andaj njoftoi se kjo mbledhje është mjaft e ngarkuar pasi kemi edhe pika tjera që do të futen në rend të ditës.

**Bahrije Ademi Murati, anëtare e kuvendit**- përsërit kërkesën e saj për futej në rend të ditës të propozim-vendimit për lirim nga pagesa e taksës për mbeturina për familjet me asistencë sociale nga data 1 mars deri me 31 dhjetor 2020. Ndërsa kërkoi që pika për ndarjen e dekoratave, të renditë si pikë e tretë e rendit të ditës.

**Xhafer Tahiri, kryetar i komunës**-kërkoi nga drejtori i Drejtorisë së Shërbimeve Publike, të sqaroi koston financiare të vendimit për lirim nga obligimi nga taksa për shërbimet e mbeturinave për familjet me asistencë sociale.

**Refik Maloku, drejtor i DSHP-së**-paraqiti sqarime lidhur me propozim-vendimin për lirim nga taksa e mbeturinave ku njoftoi se kostoja financiare vjetore për lirim nga këto obligime është 72,000.00 €.

**Habibe Gërxhaliu, anëtare e kuvendit-**adresi çështjen e pagës jubilarë, pagesës së shujtës dhe shpenzimeve të udhëtimit për mësimdhënësit e Komunës së Vushtrisë, ku vlerësoi se Ministria e Financave pas përgjigjes negative që ka dhënë lidhur me përmbushjen e këtyre obligimeve, shumica e mësimdhënësve gjatë vitit të kaluar kanë ngritur procese gjyqësore për realizimin e të drejtave të tyre ligjore. Ajo çka është shqetësuese është fakti i dëmtimit të buxhetit të komunës, nga këto pagesa por edhe rritja e shpenzimeve juridike qoftë për mësimdhënësit e po ashtu edhe për komunën. Duke marrë për bazë numrin afër 1000 mësimdhënës që do të realizojnë këto të drejta shuma e mjeteve të shpenzuara për shërbime juridike (avokat dhe përmbarues) shkon afër 200, 000.00 €. Në këtë kontekst vlerësoi se pasi që gjysma e mësimdhënësve nuk kanë ushtruar padi për realizimin e këtyre të drejtave, është e udhës që DKA, të iniciojë kërkesën në Ministrinë e Financave dhe Transfereve për përmbushjen e këtyre obligimeve.

**Ilmi Azemi, anëtarë i kuvendit-** duke ju referuar para folëses, ceku se në bazë të informatave që posedon rreth 628 punëtor të arsimit kanë fituar kontestet gjyqësore ndaj komunës, lidhur me pagat jubilarë dhe shpenzimet tjera, prej tyre 377 i kanë marrë mjete financiare të cilat ju takojnë sipas ligjit, në formë të ekzekutimit përmbarimor, ndërsa për 251 mësimdhënës tjerë komuna ka ushtruar ankesë e cila vetë sa e vonon gjykimin por se humbja e kontestoi nga ana e komunës është pothuajse e sigurt. Kësaj kur ja shtojmë faktin se janë edhe 400 punëtor tjerë arsimor që do të ushtrojnë padi atëherë kjo do të jetë një barrë e rënd për buxhetin e komunës. Duke marrë për bazë këtë situatë jo të favorshme për komunën, atëherë duhet që qeveria komunale së bashku me kuvendin të gjejnë një zgjidhje ligjore duke lidhur ujdi me punëtorët e arsimit ashtu që të shmangim shpenzimet gjyqësore që lidhen me taksat gjyqësore dhe shpenzimet përmbarimore.

**Ymer Haradinaj, anëtarë i kuvendit-** në adresimin e tij para kuvendit njoftoi se këto vendime gjyqësore kanë ardhur si rrjedhojë e lidhjes së një kontrate mes MASHT-it dhe Sindikatës së Bashkuar të Arsimit në vitin 2017. Tutje shtoi se këto të drejta dhe obligim nuk janë përmbushur që nga viti 2017 kur ka qeverisur PDK-ja, andaj kjo ka mbetur barrë për komunën. Andaj punëtorët e arsimit janë organizuar përmes sindikatës dhe i kanë realizuar të drejtat e tyre ligjor përmes padive gjyqësore. Pastaj shtoi se është i dhimbshëm fakti i rritjes së shpenzimeve sidomos ato gjyqësore që kanë të bëjnë me përpilimin e ankesës, por premtimi i DKA-së dhe kryetarit të komunës që me pagën e dhjetorit të viti 2019 të dalin edhe pagesa e pagës jubilarë dhe shujtës por kjo gjë nuk është realizuar. Të drejta ligjore nga kontrata janë realizuar për 600 mësimdhënës dhe punëtor tjerë ndërsa 400 të tjerë presin që ti realizojnë këto të drejta. Duke u bazuar në vendimin e inspektoratit të punës ku thuhet se DKA-ja e Komunës së Vushtrisë pagesën e shujtave në shumën mujore prej 42 € duhet ta ekzekutoj përmes sistemit të pagave për muajt në vijmë deri sa të ekzistoj kushtet ligjore. Andaj në bazë të kësaj komuna ka obligim që të përmbush këto detyrime ndaj mësimdhënësve sepse këta të fundit i kanë realizuar këto të drejta vetëm për afatin kohor prej 18 prillit 2017 e deri me 15 korrik 2019 dhe në bazë të kësaj del se DKA i ka borxh mësimdhënësve mbulimin e këtyre shpenzimeve edhe për afër një vit kalendarik sa i përket shujtave dhe shpenzimeve të udhëtimit konform kontratës kolektive. Lidhur me këtë ai pyeti DKA-në se a do tu paguaj mësimdhënësve shujtat shpenzimet e udhëtimit dhe pagat jubilarë për periudhën nga data 15 korrik 2019 e deri më sot si dhe a do të bëj pagesën edhe për mësimdhënësit të cilët nuk kanë ushtuar padi sepse shumë prej tyre nuk kanë besuar që kjo çështje do të aprovohet në formë pozitive për ta.

**Afrim Namani, drejtor i DKA-së-**në referimin e tij para kuvendit, falënderoi anëtarët e kuvendit për angazhimin e tyre për ta gjetur një zgjidhje për pagat jubilarë dhe shpenzimet tjera më qëllim që të mos dëmtohet buxheti i komunës. Tutje njoftoi se DKA në vitin e kaluar nga mjetet financiare që kanë mbetur në suficit nga kategoria e pagave dhe mëditjeve, drejtorja ka nxjerr një listë për

këto shpenzime për të gjithë mësimdhënësit aktiv për pagat jubilarë ku vlera totale e këtyre shpenzimeve ka qenë rreth 170,000.00€, kjo listë është dërguar në Ministrinë e Financave por që kjo nuk e ka bërë ekzekutimin. Në këto rrethana drejtorja nuk mund të bëjë pagesa, edhe pse detyrimet dalin nga kontrata kolektive e cila e ka fuqinë e ligjit, pasi që bazohet në Ligjin e Punës, por duhet kuptuar fakti se edhe Ligji i Buxheti është ligj i aprovuar nga Kuvendi i Kosovës. Në këtë kontekst ai njoftoi se janë duke u angazhuar me të gjitha kapacitetet që kanë që këto mjetet të rimburohen nga niveli qendror e ndoshta për këtë do të përdoren edhe mjet juridike siç është padia gjyqësore. Pastaj ai shtoi se është e dhimbshme që po shkaktohen të gjitha këto shpenzime si për mësimdhënësit ashtu edhe për komunën, por ceku se mësimdhënësit janë në të drejtën e tyre ligjore. Në fund tha se vazhdimisht kanë kërkuar nga Ministria e Financave që të parasheh linjën buxhetore për mbulimin e këtyre obligimeve por që një gjë e tillë nuk ka ndodhur.

**Xhefer Tahiri, kryetar i komunës**-tha se komuna është angazhuar me të gjitha kapacitetet dhe ka futur në planifikim buxhetor shpenzimet që dalin nga kontrata kolektive për mësimdhënësit, por që kjo nuk është lejuar dhe realizuar nga Ministria e Financave. Ajo se çfarë ka ndodhur është që përmes përmbaruesit janë marrë rreth 600, 000.00 € nga investimet kapitale për këtë qëllim dhe kjo vlerë vetëm sa do të rritet. Punëtorët arsimor janë në drejtën e tyre dhe këtë nuk mund ta mohoj askush. Ai njoftoi qytetarët se në investime kapitale komuna është dëmtuar për afro 1,000.000 € për mbulimin e shpenzimeve për mësimdhënësve që burojnë nga kontrata kolektive. Ajo se çfarë është duke u tentuar përmes lobimit në Asociacionin e Komunave të Kosovës, është që të gjitha komunat të ushtrojnë një padi ndaj Qeverisë së Kosovës, për rimbursimin e këtyre mjeteve financiare. Ai sqaroi se bazuar në ligjet pozitive arsimit është kompetencë e deleguar e komunave dhe që kontrata kolektive nuk është nënshkruar nga komuna por nga ministria e linjës por që dëmi iu është shkaktuar komunave respektivisht qytetarëve të komunave të Kosovës e në këtë rast edhe Komunës së Vushtrrisë. Në fund tha se kur të vjen raporti për situatën ekonomiko financiare ju do të shihni se janë hequr projektet kapitale për shkak të mbulimit të këtyre shpenzimeve të mësimdhënësve.

***Në fund të diskutimeve lidhur me rendin e ditës, kuvendi pas votimit me vota “unanime” aprovoi këtë:***

#### **R E N D I T E**

1. Shqyrtimi dhe aprovimi i Procesverbalit nga mbledhja e rregullt e kuvendit të komunës, mbajtur më 27 shkurt 2020;
2. Shqyrtimi dhe aprovimi i Procesverbalit nga mbledhja solemne e kuvendit të komunës mbajtur më 6 mars 2020;
3. Shqyrtimi i Propozim–vendimit për ndarjen e dekoratave dhe çmimeve tjera për nder të 17 qershorit ditës së çlirimit të Qytetit të Vushtrrisë;
4. Shqyrtimi i Raportit për situatën ekonomiko- financiare dhe zbatimin e planeve investuese për vitin 2019;
5. Shqyrtimi i Propozim–vendimit për formim të komisionit vlerësues për zbatim të procedurave të dhënies në shfrytëzim të pronës së paluajtshme të komunës;
6. Shqyrtimi i Propozim–vendimit për formim të komisionit për ndryshimin dhe plotësimin e Rregullores për Punën e Kuvendit dhe Organeve të tij;
7. Shqyrtimi i Draft-rregullores për dhënien e dekoratave (**shqyrtimi i parë**);
8. Shqyrtimi Draft-rregullores për menaxhimin e mbeturinave në Komunën e Vushtrrisë (**shqyrtimi i parë**);

9. Shqyrtimi Draft-rregullores për ndryshimin dhe plotësimin e rregullores për fillimin dhe mbarimin e orarit të punës së veprimtarive afariste-bizneseve në Komunën e Vushtrrisë **(shqyrtimi i parë)**;
10. Shqyrtimi i Raportit vjetor i punës së ndërmarrjes regjionale të mbeturinave “Uniteti” për vitin 2019;
11. Shqyrtimi i Projekt-planit të zhvillimit institucional i kujdesit parësor shëndetësor 2020-2024 **(shqyrtimi i dytë)**;
12. Shqyrtimi i petitionit i banorëve të lagjeve: “Bregaj”, “Haradinaj”, “Shala”, “Hasani”, “Maloku” dhe “Ibrahimi” dhe
13. Të ndryshme.
14. Shqyrtimi i Draft-rregullores për ndarjen e bursave për student dhe shpërblimeve për nxënës të Komunës së Vushtrrisë;
15. Shqyrtimi dhe aprovimi i Procesverbalit nga mbledhja e jashtëzakonshme e kuvendit të komunës, mbajtur më 23 prill 2020;
16. Shqyrtimi i Propozim-vendimit për shpalljen e konkursit për zgjedhjen e komiteteve konsultative;
17. Shqyrtimi i Propozim-vendimit për lirim nga pagesa e takës për shërbimet e mbeturinave për familjet me asistencë sociale;

1. Shqyrtimi dhe aprovimi i Procesverbalit nga mbledhja e rregullt e kuvendit të komunës, mbajtur më 27 shkurt 2020;

***Pas shqyrtimit të kësaj pike të rendit të ditës, kuvendi pas votimit në mënyrë unanime aprovoi procesverbalin nga mbledhja e rregullt e kuvendit, e datës 27 shkurt 2020.***

2. Shqyrtimi dhe aprovimi i Procesverbalit nga mbledhja solemne e kuvendit të komunës mbajtur me 6 mars 2020;

***Pas shqyrtimit të kësaj pike të rendit të ditës, kuvendi pas votimit në mënyrë unanime aprovoi procesverbalin nga mbledhja solemne e kuvendit të komunës mbajtur me 6 mars 2020.***

3. Shqyrtimi i Propozim-vendimit për ndarjen e dekoratave dhe çmimeve tjera për nder të 17 qershorit ditës së çlirimit të Qytetit të Vushtrrisë;

**Ilmi Azemi, anëtarë i kuvendit**-lidhur me propozim-vendimin për ndarjen e dekoratave, e përgëzoj komisionin dhe shoqatat e dala nga lufta për emrat që i kanë përzgjedhur për tu ndarë dekorata. Ai i vlerësoi lartë emrat dhe figurat e propozuar në listën për dekorata siç është Natyra Badivuku-Kajtazi mësuese e dalluar e cila ka dhënë kontribut të çmuar edhe në kohën e okupimit. Në fund tha se grupi kuvendar i PDK-së do ti jap mbështetje të plotë listë së propozuar për dekorata pasi janë krenar me emrat që do të nderohen.

**Xhefer Tahiri, kryetar i komunës**-arsyetoj se për nder të ditës së çlirimit të Vushtrrisë do të nderohen e vlerësohen lartë figura eminente e të merituar të qytetit të tonë. Ai falënderoi grupin kuvendar të PDK-së për mbështetjen e dhënë që i ka dhënë punës së komisionit për dekorata. Tutje ai arsyetoj çmimet apo titujt që këtë vit do të ndahen ku ceku se është e evidente që titulli “Nderi i Qyteti” këtë vit pa dyshim i takon QKMF-së përkatësisht Kujdesit Parësor Shëndetësor, shërbim ky i cili ka qenë në vijën e parë të frontit në ballafaqim me pandeminë covid-19. Pastaj çmim

“Qytetar Nderi” për këtë vit shkon për dy personalitete për ambasadorin Jan Braathu, i cili para se të ishte shef i OSBE-së në Kosovë, ka shërbyer si ambasador i Norvegjisë në Republikën e Kosovës dhe kontributi i tij për Vushtrinë është i jashtëzakonshëm për shkak se Norvegjia ka financuar sistemin e adresave të rrugëve në Komunën e Vushtrrisë, po ashtu ambasada Norvegjeze ka financuar modernizimin e zyrave të Drejtorisë së Kadastrit në Komunën e Vushtrrisë. Mandej z.Halil Kastrati është një figurë unike për të cilin të gjithë e dimë punën dhe veprimtarinë e tij por veçanërisht kontributi i tij për Komunën e Vushtrrisë është që bashkë me komunën ka ndërtuar 28 shtëpi dhe po ashtu vitin e kaluar janë dhuruar 17 banesa nga shoqata “Jetimat e Ballkanit” për familjet në nevojë të Qytetit të Vushtrrisë

**Nezir Klinaku, anëtarë i kuvendit**-tha se personalisht nuk është kundër dy çmimeve “Qytetar Nderi” për dy personalitete të cilat janë propozuar. Por në këtë rast ai përkujtoj vitin 2019 kur një anëtarë i kuvendit kërkonte që të shmangej rregullorja për arsye se personalitet të cilat ishin propozuar kishin pasur një të kaluar gati të ngjashme kishin vepruar bashkë. Por në atë rast një subjekt politikë doli aq shumë kundër sa që rregulloren komunale e quante ligj. Andaj ai as sot nuk është kundër që stafi shëndetësor të merr titullin “Nderi i Qyteti” por në këtë rast pyeti se nëse veprohet kështu a shkelet rregullorja? Pastaj në vitin 2019 publikisht në mbledhjen e kuvendit ka pasur dakordanc që vitin vijuese z.Idriz Asllani do të nderohet me çmimin “Nderi i Qytetit” dhe tani ky premtim po shkelet. Andaj nëse dikujt ky premtim nuk i bie në mend ai direkt e propozoi z.Idriz Asllanin për titullin “Nderi i Qytetit”.

**Ilmi Azemi, anëtarë i kuvendit**-tha se deklaratimet e parafolësit të tij janë plotësisht të vërteta dhe kërkoi ndjesë që nuk i është kujtuar propozimi nga viti i kaluar për nderimin me çmimin “Nderi i Qyteti” z.Idriz Asllani propozim të cilin ai e mbështeti dhe për këtë kërkoi pesë minuta pauzë që shefat e grupeve kuvendar të bien dakord për këtë propozime.

**Ali Januzi, anëtarë i kuvendit**-tha se në këtë rast vetëm sa dua ti vërtetojë fjalët e z.Nezir Klinaku sepse propozimi i vitit të kaluar ka qenë që këtë vit me titullin “Nderi i Qytetit ” të nderohet z.Idriz Asllani. Në vitin e kaluar ka pasur ide që ky titull të ndahet për gjysmë mes tij dhe z.Idriz Asllani por që kishte pasur kundërshtime. Andaj në këtë rast ai e mbështet plotësisht propozimin që z.Idriz Asllanit të ndahet titulli “Nderi i Qytetit ”. ai vlerësoi se fjala e dhënë apo premtimi duhet mbajtur dhe shtoi se kemi shumë të personalitet të komunës të cilat duhet lartësuar dhe ngritur që kanë kontribut të veçantë jo vetëm për qytetin tonë por për gjithë Kosovën.

**Basri Menxhiqi, anëtarë i kuvendit**-kërkoi që të ketë unanimitet të plotë në kuvend dhe mos të ketë kundërshti dhe mospajtime për propozimin e dhënë për z.Idriz Asllani që të nderohet me çmimin “Nderi i Qytetit”.

*Në fund të debatit lidhur me këtë pikë të rendit të ditës, kuvendi pas votimit me vota “unanime” vendosi me sa vijon:*

**1. Me këtë vendim, Kuvendi i komunës për nder të “Ditës së Çlirimit të Vushtrrisë”, më 17 qershor ndan këto mirënjohje:**

**1.1 Hasan Shkreli –prind i dy martirëve të lirisë Rrahim e Bukurie Shkreli;**

**1.2 Shukri/Adem- Kalludra- për kontributin e dhënë për çlirimin e vendit, veteran i luftës së UÇK-së**

1.3 Xhevat Imeri, prind i dëshmorit Nezir Imeri, heroit të Kosovës i cili ra heroikisht në betejën e Opterushës në Rahovec;

1.4 Riza Ibra, (post-mortum) - ish luftëtar i UÇK-së veprimtar i çështjes kombëtare;

1.5 Bekë Shyti, për kontributin e dhënë në fushën e shëndetësisë specialist i mjekësisë familjare;

1.6 Fahrije Kllokoqi, për kontributin e dhënë në fushën e letërsisë poete e dalluar;

1.7 Izet Morina, për kontributin e dhënë në lëmin e arsimit mësimdhënës i dalluar;

1.8 Natyra Badivuku-Kajtazi, mësimdhënëse dhe humaniste;

1.9 Fatmir Aliu, veteran i luftës së UÇK-së;

1.10 Rifat Mustafa, për kontributin e dhënë në fushën e arsimit dhe kontribut të çmuar në luftën e UÇK-së.

2. Për zbatimin e këtij vendimi obligohen: Zyra e Kryetarit të Komunës dhe Drejtoria për Kulturë, Rini dhe Sport dhe drejtoritë tjera kompetentet komunale.

3. Ky vendim hyn në fuqi shtatë (7) pas publikimit në faqen zyrtare të Komunës së Vushtrrisë.

1. Me këtë vendim, z. Idriz Asllani nga Komuna e Vushtrrisë i ndahet çmimi “Nderi i qytetit”, për kontributin e dhënë si veprimtar i çështjes kombëtare, pjesëmarrës në demonstratat e vitit 1981, ish i burgosur politikë si dhe për kontributin e çmuar në luftën për çlirimin e Kosovës.

2. Dorëzimi i këtij çmimi do të bëhet nga Kryetari i Komunës më datë 17 qershor- “Ditën e Çlirimit të Vushtrrisë”.

3. Për zbatimin e këtij vendimi obligohen: Kryetari i komunës, Drejtoria për Kulturë, Rini dhe Sport, dhe Drejtoria për Buxhet dhe Financa.

4. Ky vendim hyn në fuqi shtatë (7) pas publikimit në faqen zyrtare të Komunës së Vushtrrisë.

1. Me këtë vendim, Stafit të Kujdesit parësor Shëndetësor në Komunën e Vushtrrisë iu ndahet Titulli “Nderi i Qytetit” për kontributin e dëshmuar, angazhimin dhe përkushtimin në punën e tyre në luftën kundër pandemisë corona virus covid-19 në Komunën e Vushtrrisë.

2. Titulli “Nderi i Qytetit” i dorëzohet drejtoreshës së Qendrës Kryesore të Mjekësisë Familjare në Vushtri.

3. Dorëzimi i këtij çmimi do të bëhet nga Kryetari i Komunës më datë 17 qershor- “Ditën e Çlirimit të Vushtrrisë”.

4. Për zbatimin e këtij vendimi obligohen: Kryetari i komunës, Drejtoria për Kulturë, Rini dhe Sport.

5. Ky vendim hyn në fuqi shtatë (7) pas publikimit në faqen zyrtare të Komunës së Vushtrrisë.

1. Me këtë vendim, z.Halil Kastrati, drejtor i Shoqata Bamirës “Jetimët e Ballkanit” i ndahet titulli “Qytetar Nderi” i Komunës së Vushtrrisë, për kontributin e madh të dhënë në aspektin e humanizmit në ndërtimin dhe zgjidhjen e çështjes së banimit, (ndërtimin e shtëpive, blerjen e banesave dhe ofrimin e ndihmave tjera) për familjet në nevojë në Komunën e Vushtrrisë.

2. Dorëzimi i këtij titulli do të bëhet nga Kryetari i Komunës me datën 17 qershor Ditën e Çlirimit të Vushtrrisë.

3. Për zbatimin e këtij Vendimi obligohen: kryetari i komunës, Drejtoria për Kulturë, Rini dhe Sport, dhe Drejtoria për Buxhet dhe Financa.

4. Ky vendim hyn në fuqi shtatë (7) pas publikimit në faqen zyrtare të Komunës së Vushtrrisë.

1. Me këtë vendim, z.Jan Braathu, Shef i Misionit të OSBE-së në Kosovë i ndahet titulli “Qytetar Nderi” i Komunës së Vushtrrisë, për kontributin e dhënë në realizimin e projektit të sistemit të adresave të rrugëve, mbështetjen e fuqishme në financimin e modernizimit të zyrave të Drejtorisë së Kadastrit dhe projekte tjera për Komunën e Vushtrrisë.

2. Dorëzimi i këtij titulli do të bëhet nga Kryetari i Komunës me datën 17 qershor Ditën e Çlirimit të Vushtrrisë.

3. Për zbatimin e këtij Vendimi obligohen: kryetari i komunës, Drejtoria për Kulturë, Rini dhe Sport, dhe Drejtoria për Buxhet dhe Financa.

4. Ky vendim hyn në fuqi shtatë (7) pas publikimit në faqen zyrtare të Komunës së Vushtrrisë.

4. Shqyrtimi i Raportit për situatën ekonomiko- financiare dhe zbatimin e planeve investuese për vitin 2019;

Ilmi Azemi, anëtarë i kuvendit-tha se është kriter dhe standard që raportit për situatën ekonomiko- financiare dhe zbatimin e planeve investuese, në fund si shtojcë ti bashkëngjitet pasqyra e detyrimeve kontingjente të komunës, në mënyrë që anëtarët e kuvendit dhe qytetarët të jenë të njoftuar për gjendjen ekonomike dhe financiare të komunës gjegjësisht për të gjitha paditë që janë ushtruar ndaj komunës dhe të cilat në mënyrë direkt mundën me rrezikuar gjendjen dhe

qëndrueshmërinë ekonomike dhe financiare të komunës. Në këtë kontekst ai kërkoi që këto standarde të përfillen ashtu që kryetari i komunës ka obligim që në fund të këtij raporti dhe pasqyra e detyrimeve kontingjente të japë një deklaratë me shkrim ku zotohet se këto detyrime kontingjente nuk e rrezikojnë qëndrueshmërinë financiare të komunës.

**Xhefer Tahiri, kryetar i komunës**-tha se pajtohet me atë që detyrimet kontingjente duhet të jenë pjesë e raportit për situatën ekonomike dhe financiare të komunës, dhe shtoi se deklarata për qëndrueshmërinë financiare të komunës e ka nënshkruar tek pasqyrat financiare por nëse kjo ligjërisht kërkohet edhe tek raporti atëherë atë do ta nënshkruaj si aprovim nga ana e tij.

***Në fund të debatit lidhur me këtë pikë të rendit të ditës, kuvendi pas votimit me vota “unanime” aprovoi Raportin për situatën ekonomiko-financiare dhe zbatimin e planeve investuese për vitin 2019.***

5. Shqyrtimi i Propozim-vendimit për formim të komisionit vlerësues për zbatim të procedurave të dhënies në shfrytëzim të pronës së paluajtshme të komunës;

**Ymer Haradinaj, anëtarë i kuvendit**-propozoi për anëtarë të këtij komisioni z.Mehdi Bejtullahun.

**Shkëlzen Feka, anëtarë i kuvendit**-në emër të grupit kuvendar të LDK-së propozoi për anëtarë të komisionit z.Agron Përçukun.

**Lidhur me këtë pikë të rendit të ditës, kuvendi pas votimit me vota “unanime” vendosi me sa vijon:**

1. Me këtë vendim formohet Komisioni Vlerësues për zbatim të procedurave të dhënies në shfrytëzim të pronës së paluajtshme të komunës, të cekur në vendimin paraparak, përkatësisht, parcela kadastrale P-70202027-00007-0, në sipërfaqe prej 53413 m<sup>2</sup>, ZK Studime e Poshtme.

2. Përbërja e komisionit:

- 2.1 Agron Përçuku, anëtarë i kuvendit;**
- 2.2 Mehdi Bejtullahu, anëtarë i kuvendit;**
- 2.3 Adnan Lahu, ekzekutivi i komunës;**
- 2.4 Miran Halili, ekzekutivi i komunës;**
- 2.5 Besmir Ahmeti, shoqëria civile.**

3. Anëtarët e Komisionit Vlerësues në takimin e parë, me shumicë votash, zgjedhin kryesuesin i cili e kryeson komisionin.

4. Komisionit Vlerësues ka mandat për shqyrtim të ofertave vetëm për pronën e cekur në pikën një (1) të këtij vendimi.

5. Detyrat dhe përgjegjësitë:

5.2 Komisionit Vlerësues zbaton procedurat e ankandit publik për pronën e paluajtshme të komunës e cila jepet në shfrytëzim që nënkupton:



- 5.2.1 Njoftimin publik i cili zgjatë 15 ditë kalendarike nga dita e publikimit;
  - 5.2.2 Njoftimi publik publikohet në faqen zyrtare të komunës, në tabelën e shpalljeve të komunës, në vendin ku gjendet prona e komunës e cila jepet në shfrytëzim dhe së paku në njëërën nga mediat e shkruara dhe elektronike;
  - 5.2.3 Njoftimi duhet të përmbaj të dhënat kadastrale të pronës, lokacionin, përshkrimin e pronës, kohëzgjatjen e shfrytëzimit, formën e konkurrit, arsyeshmërinë e interesit publik, çmimin fillestar, kërkesat për pjesëmarrje në konkurrim, kohën dhe vendin ku mbahet ankandi dhe hapja e ofertave.
- 5.3 Pas pranimit të ofertave Komisioni Vlerësues bën vlerësimin e tyre në përputhje me kushtet e përcaktuara në njoftimin publik.
  - 5.4 Komisioni Vlerësues përzgjedh përfituesin brenda afatit prej 7 ditësh nga dita e mbylljes së njoftimit publik në rastet e vlerësimit të ofertave për dhënie në shfrytëzim afatshkurtër, ndërsa brenda 15 ditësh për rastet e dhënies në shfrytëzim afatgjatë.
  - 5.5 Njoftimin për përzgjedhjen e ofertave komisioni e publikon në faqen zyrtare të komunës si dhe të njëjtin ju dërgon palëve të përfshira në proces.
  - 5.6 Komisioni Vlerësues pas përfundimit të afatit për shqyrtimin e ankesave për dhënie në shfrytëzim të pronës së paluajtshme të komunës, ofertën e përzgjedhur e procedon te kryetari i komunës për nënshkrim të kontratës me përfituesin.
  - 5.7 Vendimet në komisionin vlerësues merren me shumicë të votave të anëtarëve të komisionit.
  - 5.8 Komisioni, për punën e tij mban procesverbal të cilin e nënshkruan procesmbajtësi dhe kryesuesi i komisionit.

6. Për zbatimin e këtij vendimi obligohen: anëtarët e Komisionit Vlerësues.

7. Ky vendim hyn në fuqi pesëmbëdhjetë (15) ditë pas regjistrimit në Zyrën e Protokollit të Ministrisë për Administrimin e Pushtetit Lokal, si dhe 7 (shtatë) ditë pas publikimit në faqen zyrtare të Komunës së Vushtrrisë.

6. Shqyrtimi i Propozim-vendimit për formim të komisionit për ndryshimin dhe plotësimin e Rregullores për Punën e Kuvendit dhe Organeve të tij;

**Ilmi Azemi, anëtarë i kuvendit**-tha se rregullorja aktuale e punës së kuvendit, është e harmonizuar me LVL-në dhe statutin e komunës, dhe tani nuk e di se përse ka nevojë të bëhet ndryshimi i kësaj rregulloreje. Megjithatë propozoi z. Shpëtim Zhegrova për anëtarë të komisionit. **Nasuf Aliu, kryesues i kuvendit**- vlerësoi se ndryshimi dhe plotësimi i rregullores së kuvendit ka ardhur si rezultat i fillimit të ndryshimit të statutit të komunës dhe këto ndryshime po bëhen me qëllim të harmonizimit të këtyre dy dokumenteve.

**Agron Përçukun, anëtarë i kuvendit-** në emër të grupit kuvendar të LDK-së propozoi për anëtarë të këtij komisioni z.Shkelzen Feka.

**Bahrije Ademi Murati, anëtare e kuvendit-** në emër të grupit kuvendar të LVV-së propozoi për anëtarë të këtij komisioni z.Hajriz Mustafën.

**Ismet Gashi, udhëheqës i zyrës ligjore-** propozoi Albanëz Tahirajn për anëtarë të komisionit.

**Pas propozimeve të dhëna, kuvendit pas votimit me vota “unanime” vendosi me sa vijon:**

**1.Me këtë vendim themelohet komisioni për përgatitje të draft-Rregullores për ndryshim dhe plotësim të Rregullores për Punën e Kuvendit dhe Organeve të tij.**

**2. Përbërja e komisionit të lartë cekur është si në vijim:**

**2.1 Nasuf Aliu, kryesues i kuvendit, kryesues i komisionit;**

**2.2 Shpëtim Zhegrova, anëtar i kuvendit, anëtar i komisionit;**

**2.3 Shkelzen Feka, anëtar i kuvendit,, anëtar i komisionit;**

**2.4 Hajriz Mustafa, anëtar i kuvendit,, anëtar i komisionit;**

**2.5 Albanëz Tahiraj, zyra ligjore, anëtar i komisionit.**

**3. Komisioni në përbërje të cekur si në pikën paraprake të këtij vendimi do të përgatis draftin e rregullores për ndryshimin dhe plotësimin e rregullores për punën e kuvendit dhe organeve të tij të miratuar më 04.04.2013, dhe procedoj për shqyrtim dhe miratim në kuvend.**

**4. Për zbatimin e këtij vendimi obligohet: komisioni i cekur në pikën 2 të këtij vendimi.**

**5. Ky vendim hyn në fuqi shtatë (7) ditë pas publikimit në faqen zyrtare të komunës së Vushtrrisë.**

**7. Shqyrtimi i Draft-rregullores për dhënien e dekoratave (shqyrtimi i parë);**

**Lidhur me këtë pikë të rendit të ditës, kuvendi pas votimit me vota “unanime” vendosi me sa vijon:**

**1. Me këtë vendim jepet në diskutim publik Draft- Rregullorja për Dhënien e Dekoratave e Komunës së Vushtrrisë.**

**2. Diskutimi publik fillon nga data 5 qershor 2020 dhe zgjat deri më 5 korrik 2020.**

**3. Obligohet Zyra komunale për informim që të ndërmerr masa për informim të qytetarëve lidhur me diskutimin publik, konform dispozitave të Udhëzimit Administrativ për Transparencë në Komuna dhe konform nenit 9.2 dhe 9.4 të Rregullores për Transparencë 01 Nr.99/13, dt. 25.4.2013.**

**4. Obligohet Komisioni i themeluar nga kuvendi që si hartuese i draft-rregullores në fjalë, të organizojë diskutimin publik konform Udhëzimit Administrativ (MAPL) Nr. 04/2018 për**

Transparencë në Komuna dhe nenit 9.5 të Rregullores për Transparencë 01 Nr.99/13, dt. 25.4.2013. Gjithashtu obligohet komisioni i sipërcekur që vërejtjet eventuale, sugjerimet apo propozimet për ndryshime t'ia prezantojë Kuvendit të komunës në rastin e shqyrtimit të dytë të draft-rregullores në fjalë, në mbledhjen e kuvendit në muajin korrik 2020.

**5. Ky vendim hyn në fuqi shtatë (7) ditë pas publikimit në faqen zyrtare të Komunës së Vushtrrisë.**

**8. Shqyrtimi Draft-rregullores për menaxhimin e mbeturinave në Komunën e Vushtrrisë (shqyrtimi i parë);**

**Ilmi Azemi, anëtarë i kuvendit**-tha se tek neni 7 pika 7.9 dhe neni 10 i kësaj draft-rregulloreje, ku përcaktohen masat ndëshkuese, kemi përsëritej të përmbajtjes së këtyre neneve. Për këtë ai vlerësoi se neni 10 janë masa ndëshkuese të cilat janë në harmoni me ligjin, ndërsa tek neni 7 pika 9 këto zgjedhje ligjore të përcaktimit të masave ndëshkuese nuk janë në harmoni me ligjin, sepse nëse gjeneruesi i mbeturinave nuk i paguan nuk i paguna obligimet nuk mund të ndëshkohet duke mos iu ofruar shërbime komunale nga drejtoritë gjegjëse. Andaj propozoi që masat e përcaktuar nga neni 7 pika 9 të hiqen nga rregullorja.

**Lidhur me këtë pikë të rendit të ditës, kuvendi pas votimit me vota “unanime” vendosi me sa vijon:**

**1. Me këtë vendim jepet në diskutim publik Draft- Rregullorja për Menaxhimin e Mbeturinave e Komunës së Vushtrrisë.**

**2. Diskutimi publik fillon nga data 5 qershor 2020 dhe zgjat deri më 23 qershor 2020.**

**3. Obligohet Zyra komunale për informim që të ndërmerr masa për informim të qytetarëve lidhur me diskutimin publik, konform dispozitave të Udhëzimit Administrativ për Transparencë në Komuna dhe konform nenit 9.2 dhe 9.4 të Rregullores për Transparencë 01 Nr.99/13, dt. 25.4.2013.**

**4. Obligohet Drejtoria e Shërbimeve Publike që si hartuese i draft-rregullores në fjalë, të organizojë diskutimin publik konform Udhëzimit Administrativ (MAPL) Nr. 04/2018 për Transparencë në Komuna dhe nenit 9.5 të Rregullores për Transparencë 01 Nr.99/13, dt. 25.4.2013. Gjithashtu obligohet drejtoria e sipërcekur që vërejtjet eventuale, sugjerimet apo propozimet për ndryshime t'ia prezantojë kuvendit të komunës në rastin e shqyrtimit të dytë të draft-rregullores në fjalë, në mbledhjen e kuvendit në muajin qershor 2020.**

**5. Ky vendim hyn në fuqi shtatë (7) ditë pas publikimit në faqen zyrtare të Komunës së Vushtrrisë.**

**9. Shqyrtimi Draft-rregullores për ndryshimin dhe plotësimin e rregullores për fillimin dhe mbarimin e orarit të punës së veprimtarive afariste-bizneseve në Komunën e Vushtrrisë (shqyrtimi i parë);**

Lidhur me këtë pikë të rendit të ditës, kuvendi pas votimit me vota “unanime” vendosi me sa vijon:

1. Me këtë vendim jepet në diskutim publik Draft-Rregullorja për Fillimin dhe Mbarimin e Orarit të Punës së Veprimtarive Afariste-Bizneseve në Komunën e Vushtrrisë.

2. Diskutimi publik fillon nga data 5 qershor 2020 dhe zgjat deri më 5 korrik 2020.

3. Obligohet Zyra komunale për informim që të ndërmerr masa për informim të qytetarëve lidhur me diskutimin publik, konform dispozitave të Udhëzimit Administrativ për Transparencë në Komuna dhe konform nenit 9.2 dhe 9.4 të Rregullores për Transparencë 01 Nr.99/13, dt. 25.4.2013.

4. Obligohet Drejtoria për Ekonomi, Bujqësi, Pylltari dhe Zhvillim Rural e Komunës së Vushtrrisë që si propozues i draft-rregullores në fjalë, të organizojë diskutimin publik konform Udhëzimit Administrativ (MAPL) Nr. 04/2018 për Transparencë në Komuna dhe nenit 9.5 të Rregullores për Transparencë 01 Nr.99/13, dt. 25.4.2013. Gjithashtu obligohet drejtoria e sipërcekur që vërejtjet eventuale, sugjerimet apo propozimet për ndryshime t’ia prezantojë Kuvendit të komunës në rastin e shqyrtimit të dytë të draft-rregullorës në fjalë, në mbledhjen e kuvendit në muajin korrik 2020.

5. Ky vendim hyn në fuqi shtatë (7) ditë pas publikimit në faqen zyrtare të Komunës së Vushtrrisë.

10. Shqyrtimi i Raportit vjetor i punës së ndërmarrjes regjionale të mbeturinave “Uniteti” për vitin 2019;

*Pas shqyrtimit të kësaj pikë të rendit të ditës, kuvendi pas votimit me vota “unanime” aprovoi Raportin vjetor të punës së ndërmarrjes regjionale të mbeturinave “Uniteti” për vitin 2019.*

11. Shqyrtimi i Projekt-planit të zhvillimit institucional i kujdesit parësor shëndetësor 2020-2024 (shqyrtimi i dytë);

Lidhur me këtë pikë të rendit të ditës, kuvendi pas votimit me vota “unanime” vendosi me sa vijon:

1. Me këtë vendim aprovohet Plani Zhvillimor Institucional i Kujdesit Parësor Shëndetësor 2020-2024.

2. Qëllimi i aprovimit të këtij plani është konsolidimi i infrastrukturës juridike me qëllim të arritjes së objektivave në drejtimin e qartë të politikave të kujdesit shëndetësor në komunë, i cili do të jetë udhërrëfyes i vlefshëm për planifikimin e aktiviteteve në Kujdesin Parësor Shëndetësor.

**3. Për zbatimin e këtij vendimi obligohen: Drejtoria për Shëndetësi dhe Përkujdesje Sociale, Qendra Kryesore e Mjekësisë Familjare dhe sektorë tjerë kompetent që i referohen këtij dokumenti.**

**4. Pjesë përbërëse e këtij vendimi është dokumenti me emërtimin Plani Zhvillimor Institucional i Kujdesit Parësor Shëndetësor 2020-2024 i Komunës së Vushtrrisë.**

**5. Ky vendim hyn në fuqi pesëmbëdhjetë (15) ditë pas regjistrimit në Zyrën e Protokollit të Ministrisë për Administrimin e Pushtetit Lokal, si dhe 7 (shtatë) ditë pas publikimit në faqen zyrtare të Komunës së Vushtrrisë.**

**12. Shqyrtimi i petitionit i banorëve të lagjeve: “Bregaj”, “Haradinaj”, “Shala”, “Hasani”, “Maloku” dhe “Ibrahimi”;**

**Lidhur me këtë pikë të rendit të ditës, kuvendi pas votimit me vota “unanime” vendosi me sa vijon:**

Kuvendi i Komunës së Vushtrrisë në mbledhjen e mbajtur më datë **28 maj 2020**, ka shqyrtuar petitionin e parashtruar nga z.Sinan Maloku përfaqësues i lagjeve: Maloku, Bregaj, Haradinaj, Shala, Hasani dhe Ibrahimi për ndarjen e mjeteve financiare për financimin e projektit të ndriçimit dhe trotuarit të rrugëve në këto lagje, andaj në këtë rast, Drejtorisë së Shërbime Publike dhe Drejtorisë për Buxhet dhe Financa i parashtron këtë:

### **REKOMANDIM**

Kuvendi i Komunës së Vushtrrisë i rekomandon drejtorive, të sipërcekura të ndajnë mjete financiare konform mundësive financiare dhe ligjore, për financimin e projekteve të ndriçimit publik dhe shtrimin e trotuarit në rrugët e lagjeve: Maloku, Bregaj, Haradinaj, Shala, Hasani dhe Ibrahimi të fshatit Stanoc i Epërm.

*Rekomandohet që Drejtoria për Shërbime Publike, si dhe Drejtoria për Buxhet dhe Financa, t'i zhvillojnë procedurat e akordimit të kësaj ndihme financiare konform legjislacionit në fuqi, për financimin e projekteve të lartëcekura.*

**13. Të ndryshme.**

**a). Shqyrtimi i Draft-rregullores për ndarjen e bursave për student dhe shpërblimeve për nxënës të Komunës së Vushtrrisë (shqyrtimi i dytë);**

**Gresa Muli, anëtare e kuvendit**-shtroj çështje e përcaktimit të pikëve tek përfituesit e burse për kandidatët që përfitojnë 5 pikë në rastet kur nuk i kanë në jetë prindërit, dhe këtu dilema shtrohet se a bëhet fjalë vetëm për njërin prind, apo se piket përfitohen vetëm në rastet kur të dy prindërit nuk janë në jetë. Për këtë ajo kërkoi që kjo pikë të sqarohet dhe të hiqen dilemat.

**Mejreme Ismajli, anëtare e kuvendit**-kërkoj që të bëhen dallime sa i përket rangimit sepse Fakulteti i Mjekësisë nuk është i nivelit bechlor, ai i stomatologjisë dhe Fakulteti Juridik është katër vjeçar.

**Afrim Namani, drejtor i DKA-së-sqaroi** se sa i përket përfitimit të pikëve për kandidatët të cilët nuk i kanë prindërit në jetë, është mendim i komisionit se këtë kandidat do ti fitojnë pikët edhe në rastet kur vetëm njërin prind nuk e kanë në jetë. Ndërsa shtoi se edhe fakulteti me kohëzgjatje katër vjeçar është i nivelit bachelor.

*Lidhur me këtë pikë të rendit të ditës, kuvendi pas votimit me vota “unanime” aprovoi Rregulloren për ndarjen e bursave për student dhe shpërblimeve për nxënës të Komunës së Vushtrrisë.*

b). Shqyrtimi dhe aprovimi i Procesverbalit nga mbledhja e jashtëzakonshme e kuvendit të komunës, mbajtur më 23 prill 2020;

*Pas shqyrtimit të kësaj pike të rendit të ditës, kuvendi pas votimit në mënyrë unanime aprovoi procesverbalin nga mbledhja e jashtëzakonshme e kuvendit të komunës, mbajtur më 23 prill 2020.*

c). Shqyrtimi i Propozim-vendimit për shpalljen e konkursit për zgjedhjen e komiteteve konsultative;

**Lidhur me këtë pikë të rendit të ditës, kuvendi pas votimit me vota “unanime” vendosi me sa vijon:**

**1. Miratohet propozimi i Kryetarit të Komunës për shpallje të konkursit për zgjedhje të anëtarëve të komiteteve konsultative të Kuvendit si në vijim:**

- 1.1. Komiteti Konsultativ për Arsim, Kulturë, Fe, Sport dhe Rini (7 anëtarë);
- 1.2. Komiteti Konsultativ për Zhvillim Ekonomik dhe Shërbime Publike (7 anëtarë);
- 1.3. Komiteti Konsultativ për Urbanizëm dhe Mbrojtjen e Ambientit (7 anëtarë);
- 1.4. Komiteti Konsultativ për Shëndetësi dhe Përkujdesje Sociale (7 anëtarë);
- 1.5. Komiteti Konsultativ për të Drejtat e Njeriut dhe Barazi Gjinore (7 anëtarë);

**2. Kushtet dhe kriteret e konkursit duhet të jenë në përputhshmëri me nenin 8 të Udhëzimit Administrativ (MAPL) nr. 01/2016 për Procedurën e Themelimit, Organizimin dhe Kompetencat e Komiteteve Konsultative në Komuna.**

**3. Kompensimi i anëtarëve të komitetit bëhet në pajtim me nenin 14 të Udhëzimit Administrativ (MAPL) nr. 01/2016 për Procedurën e Themelimit, Organizimin dhe Kompetencat e Komiteteve Konsultative në Komuna.**

**4. Për zbatimin e këtij vendimi obligohet: Kryesuesi i kuvendit, Njësia e Personelit dhe Sekretaria e kuvendit.**

**5. Ky Vendim hyn në fuqi pesëmbëdhjetë (15) ditë pas regjistrimit në Zyrën e protokollit të Ministrisë për Administrimin e Pushtetit Lokal, si dhe pas publikimit në faqen zyrtare të Komunës së Vushtrrisë.**

ç). Shqyrtimi i Propozim–vendimit për lirimin nga pagesa e takës për shërbimet e mbeturinave për familjet me asistencë sociale;

**Melihate Basholli-Latifi, anëtare e kuvendit**-tha se duke parë që borxhi për ofrimin e shërbimeve të menaxhimit të mbeturinave, për familjet me asistencë sociale është duke u grumbulluar, propozoi që këto familje të lirohen në formë të përhershme nga ky obligim.

**Nezir Klinaku, anëtarë i kuvendit**-tha se në vendim duhet të specifikohet afati për të cilin vlen lirimi nga kjo pagesë.

**Bahrije Ademi Murati, anëtare e kuvendit**-tha se propozimi i grupit të saj kuvendar, ka qenë që kjo masë të ketë efekt juridike nga data 1 mars deri me 31 dhjetor 2020, kohë kjo kur është renduar gjendja sociale e kësaj kategorie si rezultat i pandemisë covid-19.

**Xhefer Tahiri, kryetar i komunës**-tha se kostoja financiare e këtij vendimi nuk është e vogël, dhe njoftoi se të gjitha këto masa lehtësuese të ndërmarra nga qeveria komunale, për lirimin nga pagesat e obligimeve financiare, mendon se do të kompensohen nga Qeveria e Kosovës, sepse në të kundërtën komuna do të ketë probleme të mëdha financiare në mbulimin e shpenzimeve tjera dhe financimin e projekteve me rëndësi për qytetarët.

**Lidhur me këtë pikë të rendit të ditës, kuvendi pas votimit me vota “unanime” vendosi me sa vijon:**

1. Me këtë vendim lirohen nga pagesa e taksës për ofrimin e shërbimeve të menaxhimit të mbeturinave, familjet me asistencë sociale të Komunës së Vushtrrisë.

2. Vendimi për lirimin nga obligimi i pagesës së takës për shërbimet e mbeturinave bëhet si rezultat i rëndimit të gjendje sociale të familjeve që përfitoj nga skema sociale si pasojë e pandemisë covid-19 e njohur si corona-virus.

3. Për zbatimin e këtij vendimi obligohen: Drejtoria për Shërbime Publike dhe Drejtoria për Buxhet dhe Financa.

4. Ky vendim hyn në fuqi shtatë (7) ditë pas publikimit në faqen zyrtare të Komunës së Vushtrrisë dhe fillon të prodhojë efekt juridik nga data 01 mars 2020 deri më datën 31 dhjetor 2020.

Mbledhja përfundoi në ora 16:00.

**Bastri Duraku**

  
Procesmbajtës

**Nasuf Aliu**

  
**Kryesues i Kuvendit**

